

Jahresbericht für das Vereinsjahr 2023

Ziemlich genau vor dem Jahr händ mir ebenfalls do im Restaurant Mettlähof üsi Jahresversammlung gha.....
alli wo gad am neu Statutä machä sind wüssäd etz, dass mer bimä Verein jo nöd vo
Generalversammlung redet... aber zu dem chömmer später no.

Mir händ do es Wahljahr gha und händ de Daniel Müller als Ersatz vom Sepp Bumbacher dörfä in
Vorstand wählä.

Über di Turnerischä Aktivitätä sowiä dä Trainingsbetrieb werded nochher de Dani und de Roland
brichtä.

Zwei Wuchä noch de Jahresversammlung händ sich acht Männerturner für de Skitag i de Lenzerheide
troffä. Will de TV Eschlikon au gad det ds Skiweekend gha hät, hät mer sich denn denä gad zum Apres
Ski ahgeschlossä und trotzdem sind alli wieder pünktlich abfahrbereit gsi. Nochher isch mer denn no is
Pöschtl go znachtessä.

Im März händ denn wieder ds Interne Volleyballturnier sowie d Hinterthurgauer Hallämeisterschaftä
stattfundä.

Am 5. April hämmer im Pöschtl wieder üsän Jöhrlichä Jassobig gha. We jedes Jahr hät wieder jedä
Teilnehmer en Priis mitbrocht, sodass jedä au wieder öppis mit hai hät chenä neh.

Über d Turnfestsaison wotti nöd viel Wort verlüürä.... Det chunt jo nochher de Dani dazuä. Mini
Highlights sind sicher d Ahkündigung vom Stadionspeaker Andy Brühwiler a de TGM und die
grandiosi Fanunterstützig bim Barrä am Turnfäscht gsi.

Zum Saisonabschluss hämmer üs I de Stockeholzhüttä zum Grillobig troffä. Sehr en schönä Alass gsi...
wo we jedes Jahr erfreulich viel vo eu teilgnoh hend. Und Nur ai Wuchä später isch ebäfalls mit
Volleyball witergangä am Thurgauer Spieltag in Amriswil.

Und denn hät für üs bitz es strengers Jahr ahfgangä mit überdurchschnittlich viel Arbeitsihsätz. A derä
Stell es Dankä a alli für eui Ihsätz.

Dasjahr hämmer wiedermol d 1. Augustfiir durägführt. Glücklicherwiis hämmer wieder chennä im
Bächelacker ufstellä und obwohl s wetter nöd so mitgmacht hät, hät eigetli glich no e schöni Ahzahl
Eschliker und Eschlikerinnä de Weg det anä gfundä. Di offizielli Reed hät d Cornelia Komposch ghaltä
und für di passend Musig händ d Rachlisbuäbä mit Ihrnä Schwizerörgeli undem Bass gsorgt.

Und scho sind D Volleynights wieder vor de Tür gstandä. Bim Verkehr reglä, am Grill und mit Schiri
Ihsätz hämmer de TV unterstützt und selber au no am Turnier teilgnoh.

Mitte September simmer denn uf ä zwaitägigi Turnfahrt. 27 Männerturner händ sich bi de
B. Hollenstein AG besammlät.

Ä chliini Wanderig zumä Hof womer bi traumhaftem Usblick feini Grilladä und Salöt gessä hend, en
Kaffibsuäch bi de Kambly zum Sackwiis Guüzli poschtä, S kennälernä vonerä traditionellä Sportart...

em Platzgä und denn am zweitä tag e E bike Tour händ zumä Echt glungänä Wuchänend biitrait. Am Ernst und am Zuber nomol dankä vielmol fürs organisierä.

Nochdem mer im Oktober wieder sind go Bowlä und de Herbstbummel mitem TV gha hend, isch denn im November wieder mitem strengerä Teil witer gangä.

A de Eswa hämmer Ständ ufgstellt, Buffet Ihrichtät, i de Festwirtschaft gschaffät, sowiä aber au no en egetä Stand mit de andernä turnendä verein gha, wo noch Messeschluss Barbetrieb gsi isch.

Und Schlag uf Schlag ischäs gad witergangä. Über d Täg vom Dunschtig 23igste bis Sunntig 26. November händ di Turnendä Verein Eschlikon nocherä langä pausä, nämli sitem Januar 2019 endli wiedermol chönä ä Turnerunterhaltig duräfüührä. Dä Männerturnverein hät mit Skelet underä Baströcklitrupp ä Tanz- und Barrävorfüührig gmacht.

Nochdem mer üs vo dem Intensivä Wuchänend erholt händ isch denn au gad scho d Advents zit do gsi und de TVE-Glögg Stand hät eröffnät. Drü öbig hät de Männerturnverein de Ladä gschmissä und näbt Glüähwii und Punsch au Gerstäsuppä und Raclette serviert.

Ebäfalls am Glöggstand isch denn üsän Chlausobig losgangä. Und wiä aigetli di ganz zyt sind sich au a dem obig de Petrus und d Frau Holle nöd einig gsi... und so häts halt au a dem obig wieder gregnät. Mer sind denn z Fuäss witer id Aula uf Walläwil. Det hät üs zersch de Lukas Meili de Aperos spendiert, (beschtä Dank nomol) und abschlüssend hämmer Salot und Spaghettiplausch vom Pöschtli becho. Notürlich isch au dasjohr dä Samichlaus no vorbichoo und hät sich de aint oder ander zur Brust gnoh. Au wenn di meischtä vo üs nüm würkli Sprüchli im Kopf händ, hät au das johr wieder ain mitem Megasprüchli uftrumpft und än anderä hät dur d gegend gschrauä, er welli 2024 wieder bim Fachtest Volleyball mitmachä....

Am letschtä Mittwoch vor Wiähnacht hät denn s traditionelle fondue-schüssä wieder stattfundä, wo mir abermals vo 2 Mitglieder usem Schützäverein betreut und gwertät wordä sind.

Pünktlich zum Joresend isch denn au wieder dä Silvesterlauf gsi. Aber andersch als bim Glögg-Stand isch für de Alass ds wetter fast sogar bitz z guät gsi.

Wiedermol en Alass wo mir vom Verein us nöd händ müäsä schaffä... De aint oder ander vo üs isch mitgrennt, anderi händ gfänät oder denn die neu Harassälaukategorie verfolgt.

Zum letschtä offiziellä Termin, em alljöhrllichä Keglä z Wängi, hät sich wiä so oft wäg dä Skiferiä nur äs chlisäs Grüppli vo 8 Männerturnä troffä und en hochstehändä internä wettkampf durägeführt.

Jo und etzz simmer wieder do a üsärä Johresversammlig und startäd wieder inäs hoffentlich gliich cools johr mit dä Höhepunkt Thurgauer Meisterschaft im egetä Dorf und nochher notürli am Kantonalturnfescht.

Für den Männerturnverein

Der Präsident

Peter Eberhard.